

Dithero tsa Tirelano mo Kutlwanong

45/2013 Thero ka Sontaga wa 15 morago ga moletlo wa Borarobongwe/Trinitate, e le ka 08. 09. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 396 - 363/375
2. **Thapelo:** Ao, Morena Jesu Keresete, re rata go lebogela pholoso e o e re diretseng ka go re swela le ka go re tsogela mo losong gore re tle re phologe ka bosakhutleng. Ke gona re kopang Mowa o o Boitshepo wa gago gore ka one o tsosolose le go tiisa tumelo ya nnete mo go rona. E tle e re motsing re hudugang mono, re goroge le ka yone kwa wena o busang gone, e leng kwa legodimong la gago. Ao, o re utlwe ka ntlha ya loso le tsogo ya gago, Jesu Keresete, Morena, Mopholosi wa rona. Amen.
3. Epistolo ka fa thulaganyong ya 2 e kwadilwe mo go 1 Petoro 5:5c-11;
Efangele ka fa thulaganyong ya 1 e kwadilwe mo go Matheo 6:24-34.
4. A go ipolelwe tumelo ya bokeresete!
5. Sefela sa 188 - 174/181
6. Thapelo ya mmadi wa thero.
7. **Efangele** ka fa thulaganyong ya 5 e kwadilwe mo go Luka 17:5-6, e re: "Jaanong baapostolo ba raya Morena ba re: 'Re okeletse tumelo!' Mme Morena a re: 'Fa lo ka bo lo na le tumelo e e kana ka tlhaka ya peo ya mmasetete, lo ne lo ka raya setlhare se sa murubei lo a re: 'Kumoga o itlhome mo lewatleng!' mme se ka lo utlwa.'" Amen.
8. **Thero:** Phuthego e e rategang ya Morena wa rona Jesu Keresete, Sontaga seno sa rona ke sa bo 15 morago ga moletlo wa Trinitate. Kana mo sebakeng sa Trinitate re fitlhela go na le ditemana tse di farologanyeng tse di lebanyeng le mongwe le mongwe yo o leng teng le yo o tshelang mo teng ga kereke ya ga Keresete. Mo go nna ke fitlhela ditemana tseo di tshwana le seipone se mongwe le mongwe o ka itebang mo go sone go bona, fa a sa ntse a le mo tseleng e e tshesane e e yang kwa legodimong.

Phuthego, fa re buisa kgaolo e, re fitlhela go buiwa ka ga dintlha tse tharo, e bong dikgopiso, go itshwarelana le ka tumelo. Ka moo re bona mafoko a thero ya rona a nopotswe mo ntlheng ya bofelo e leng tumelo.

Fa jaanong re ipotsa gore tumelo ke eng, re bona karabo e e reng: Tumelo ke go ikanya, gongwe go nna le boikanyo jo bo tihomameng jo bo sa belaeleng sepe malebana le ditsholofetso tsotlhe tse Modimo o di re solofeditseng mo Lefokong la ona. Fa Morena a sena go bua le barutwa ka ga dikgopiso le ka ga go itshwarelana, re ba utlwa ba mo kopa ba re: Morena, re okeletse tumelo!

Phuthego, fa o utlwa kopo e e ntseng jaana, o lemoga ka pele gore ruri ga go na ope yo o ka reng: Nkokeletse, fa a sa bona, gongwe fa a sa lemoga gore o tla tlhaelelwa. Mme fa barutwa ba fitlhela e le gore ba tlhaelelwa ke tumelo. Tumelo e motho o ka reng: Ke sephiri sa motho. Fela bone ba fitlhetse ba sa fitlhelle felo, gongwe ka ntlha ya bokowa jwa tumelo ya bone. Ke gantsi re fitlhetseng Jesu a kgalemelela barutwa ba gagwe go nna le tumelo e e bokowa, gongwe go sa dumeleng ga bone. Mo Beibeleng, fa go buiwa ka tumelo re fitlhela go angwa maina a diganka tse di rileng tsa tumelo, jaaka Noa, Aborahame, Henoge, Daniele, le ditsala tsa gagwe, le Setefano le ba bangwe jalo. Batho bao ba ne ba ikanya Modimo, ba sa tsikinyege ba tshwana le pinagare. Ruri ba ne ba itse gore Modimo ga se Modimo o o fetogeng ntlheng ya ditsholofetso tsa one. Fa re leba Aborahame, re mmona a ne a sa ka a kabakanya fa go twe: A tswe mo losikeng lwa ga gabo le mo lefatsheng la ga gabo, mme a ye kwa lefatsheng le Morena Modimo o tla mo dirang morafe o mogolo mo go lona, a be a mo raya a re: Ke go tshegofatsa, ke tumisa leina la gago gore o nne tshegofatso.

Ba ga etsho, fa go buiwa ka ga tumelo, a re ke re lebe mosadi wa Mokanana le molaodi wa Kaperenaume, ba ba neng ba se na boikhutso ka ntlha ya tlalelo ya bolwetse jo bo neng bo tsene mo lelapeng, mme e bile ba tabogile le lefatshe lotlhe, ba tlhoka thuso. La bofelo ba tsile kwa go Jesu. E kete ba re, le fa re se na tshiamelo le tetla ya go bua le Mojuta, le fa go ntse jalo, re ya go ene, a re amogela, gongwe a re koba, re a ya. Jesu o kgalemetse mosadi wa Mokanana ka mafoko a a botlhoko e le tota. Mme ene a mo fetola ka bonolo le ka boikokobetso a re: "Ee, Morena, le tsone dintšanyana di tle di sele matlhotlhora a a wang ka fa tlase ga tafole ya bana," Mareko 7:28. Leba gape le mo go Luka 7:8. Ka bobedi jwa bone ba thusitswe ka ntlha ya tumelo ya bone. Gonne kwa ntle ga tumelo ga go kgonege sepe. Re bona Morena a

roma barutwa ba gagwe, a ba raya a re: "Thata tsotlhe ke di neilwe kwa legodimong le mo lefatsheng," Math. 28:18-20. Mo go Luka 10:17 re ba utlwa ba begela Morena Jesu ka boitumelo ka ga se se ba itumedisitseng mo thomong ya bone. Le Jesu o ne a ba bolelela gore ba se itumelele tse di ntseng jalo, mme bogolo ba itumele ka maina a bone a kwadilwe kwa magodimong, Luka 10:20.

Gape re ba bone ba palelwa ke go thusa le go ntsha mowa o o bosula mo molwetseng. Ba ga gabo, ba be ba mo tsisa go Jesu gore a mo thuse. Fa Jesu a mo thusitse, barutwa ba tla kwa go Jesu kwa thoko ba re: "Ke go reng fa rona re reteletswe ke go o kgarametsa ntle?" A be a ba raya a re: Ke ka gore lo tlhoka tumelo, Matheo 17:14-20.

Phuthego, temana ya rona ya bofelo e re: "Mme Morena a re: 'Fa lo ka bo lo na le tumelo e e kana ka tlhaka ya peo ya mmasetete, lo ne lo ka raya setlhare se sa murubei lo a re: 'Kumoga o itlhome mo lewatleng!' mme se ka lo utlwa.'" Phuthego, mmasetete ke e nnyenye e le tota, mme fa e jetswe, ya ba ya mela, e na le namane e tona ya setlhare. Se e ke reng, fa ba go supetsa peo ya sone, o se dumele. Ka mafoko ao, Jesu o tshwantsha tumelo ya nnete le peo ya mmasetete. Gonne tumelo ya nnete e a gola, e bile ga e na go thibelwa ke sepe. Seo re se bona ka bone barutwa ba Morena morago ga tsogo, le fa ba sena go amogela Mowa o o Boitshepo. Tumelo ya bone e ne ya tshwana le molelo o o butswelang ke phefo kwa morago. Re bone le tumelo ya moporofeti Elia. Ene o ne a sa tshaba le boidiidi jo bo neng bo ikgaogantse le Morena Modimo ka ntlha ya dikgatlhego le maitumelo a lefatshe leno. A ba bontsha gore ene o dumela mo Modimong, o ya reng fa a bua le one o mo reetse le go mo araba.

Barutwa ba bone ba palelwa ke go fodisa le go kgarametsa mowa o o bosula ntle, le fa ba ne ba neilwe maatla a go dira jalo. Fa ba bona, Jesu a foditse motho joo, ba gakgamala, ba be ba botsa Jesu kwa thoko gore ke go reng, fa bone ba paletswe. Jesu a ba fetola sentle a re: "Ke gore lo tlhoka tumelo." Fa lo ka bo lo na le tumelo, gongwe ke re lo ne lo dumela, lo ne lo ka raya le yone thaba lo re: Tloga fa, o tlhome fale, tota go ka dirafala jalo kwa ntle ga mathata ape.

Modumedi ka nna, jaanong Lefoko mo sebakeng seno le bua le nna, le wena, ba re leng fano, le ba re ipitsang badumedi. Kana le rona re neilwe thata le tshiamelo go bua le go bitsa leina le le boitshepo la Modimo ka dinako tsotlhe, mo ditlalelong, mo malwetseng, mo dintshong tota le mo sebakeng sa go iketla. Re dire jalo ka tumelo e e sa kabakanyeng. Kana gantsi re rapela

fela ka nako ya mathata, le gona re sa tiisetse, gonne fa e kete bolwetse bo a gola, re a tswa, re ya go batla thuso go sele. Go nne jaaka bone ba rapela modimo o sele o o nang le thata le nonofo go gaisa wa rona. O be o fitlhele bontsi bo tlogetse dikereke tsa bone, bo ineetse mo dikerekeng tseo, etswe le tsona go na le mabitla a baphuthego ba bone.

Ka moo Balutere ba ga etsho ba bantle, a re se ikobonyeng ntlheng ya tumelo ya rona ya go dumela mo Modimong o o Borarobongwe, o o re bileditseng phologong ka Keresete, Morena, Morekolodi wa rona, le rona re fetsa ka go kopa Mowa o o Boitshepo ka Jesu Keresete, re re: "Morena, re okeletse tumelo!" Amen.

9. Thapelo: Modimo, Morena Jesu Keresete, re lebogela thero ya gago ya Efangele, gonne ka yone o re file, le go re bolokela tumelo ya mmannete e e tlhomameng. Morena o itse, fa ruri re ne re sa ikanyege mo tumelong ya rona, gonne gantsi re go tlogetse, ra ya go batla thuso go sele. Morena, bula le go sedimosa tlhaloganyo tsa rona gore re itse, fa wena o itse ditlhokego tsa rona, le gore o na le go di re dirafaletsa, fa re tla go wena ka tumelo ya nnete e e tlhomameng. Morena, utlwa thapelo ya rona ka ntlha ya lorato lo logolo lwa gago, Jesu Keresete yo o rileng: Re kope tsotlhe ka leina la gago, mme di tla re dirafalela. Amen. Thapelo ya Morena: Rara wa rona yo o mo legodimong ...

10. Sefela sa 187 - 173/180

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke T. Ratshefola, ka ngwaga wa 2001/2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.